



Cussegl da vischnaunca 23-2013/2016
Seduta dils 21 d'uoost 2015

Protocol

dalla seduta dil cussegl da vischnaunca,
venderdis, ils **21 d'uoost 2015**, allas 18¹⁵- 20⁵⁰
en Sala Peter Kaiser, Claustra

Presidi: Edgar Durschei

Actuar: Ervin Maissen

Presentes:

- | | | |
|----------------------------|--|--|
| a) Cussegl | Christoph Berger
Armin Berther
Adrian Bigliel
Silvio Candinas
Adrian Deflorin
Edgar Durschei
Rita Huonder-Tenner | Wendelin Jacomet
Jordana Lozza-Desax
Armin Manetsch
Flavio Murer
Adrian Pally
Alfred Spescha
Rico Tuor |
| b) Suprastonza
comunala | Francestg Cajacob
Madlen Deflorin-Spescha
Cecilia Maissen-Desax | Iso Mazzetta
Roger Tuor |
| c) Perstgisas | Livio Zanetti | |
| d) Hosps | 9 personas | |

"Inaga ad onn eis ei usit ch'il cussegl seraduna per ina seduta campestra.

Oz havein nus saviu prender investa dils stabiliments dalla serenera Raveras. Tier las informaziuns tecnicas retschevidas vegnis vus aunc orientai sut tractanda 3 pli detagliau davart las cefras entras la suprastonza communal.

La sanaziun dalla baselgia sogn Martin cheu en claustra cuosta grondas summas. Sco ins ha dacuort intervegniu ord las medias ei la mesadad dils 15 milliuns aunc buca finanziada. Oz havein nus la pusseivladad da mussar solidaritad cun in'impurtonta instituziun e petga da nossa vischnaunca. Tgei fuss Mustér senza la claustra e la scola gimnasiala. Denton astgein nus era admonir la claustra dad esser pertscharta dalla populaziun e dil commerci ed era esser solidaris cun els. Sch'il pievel sa star davos sia claustra vegnan omisdus a profitar.

L'obligaziun morala dalla claustra enviers la vischnaunca ei buca mo da mantener ils edificis (quei ch'ei naturalmein era fetg impurtont) e dumandar il vitg per agid, mobein da purtar ils pelegrins cheu en nies vitg ed aschia segidar cul prosperar da nossa vischnaunca.

Per bia atenziun ellas medias internaziunalas procuran era las cuorsas dil cup mundial da parasgular. Cheu para ei denton che nossa uniun turistica e la vischnaunca hagian buca encurschiu il potenzial da marketing che quell'occurrenza ha. Cheu stuess vegnir tratg a nez bia meglier la presenza dallas medias e dils sportists sco quei ch'ei vegn fatg p.ex. a Lenzerheide cun ina cuorsa da FIS ed autras. Quei vul dir enzatgei, sch'igl organisatur numna la regiun sisum la Surselva mundialmein in dils megliers loghens per sgular. Sper las grondas tiaras sco Brasilia, Mexico, Australia e Spagna vegn il pign vitg da Mustér numnaus el medem mument!

Ils organs da survigilanza da selvaschina e catscha ston aunc vegnir pertscharts che nus essan buca mo dependents da catschadurs e luvs e suenter nuot pli. Cun da quellas tenutas vegn ins buca da gudignar lutgas. Sco catschadur haiel aunc mai fatg l'experiencescha ch'ils camutschs ein buca scapai sin tuttas varts suenter haver dau giu in plum ord la buis.

Ei ha aunc giu liug ulteriuras occurrenzas che han procurau per program duront quella biala stad. Sperel ch'era vus haveis passentau bialas vacanzas e gudio in ni l'autra purschida. La situaziun futura sil sector turistic enteifer nossa vischnaunca fatschenta buca mo igl interpellant da questa sera. Cheu sperein nus da survegnir oz claras e segiras informaziuns co la situaziun sepresenta actualmein. Ei ha gia ussa schon cuzzau bia memia ditg e la malsegirtad ei muort la munconza d'informaziuns gronda. La comunicaziun propagada aschi ault lai salidar. Ussa sto vegnir fatg quotas cun tgau.

Dapi la davosa seduta dil cussegl da vischnaunca han las suandontas vischinas bandunau il terrester. Cun in bien patratg lein nus seregurdar da:

Lucia Monn-Deflorin, da Disla, naschida ils 24 d'avrel 1927, morta ils 20 da zercladur 2015, ed Antonia Deragisch-Schmed, da Scaletta, naschida ils 26 d'october 1934, morta ils 4 da fenadur 2015.

Ellas ruaussien en pasch.

Fetg grond plascher hai jeu da comunicar dapi nossa davosa seduta dil cussegl da vischnaunca duas naschientschas:

Travis Ambrose Tenner, naschius ils 30 da zercladur 2015, feagl da Leonhard ed April Rone Tenner da Funs ed Aaron Alexander Reith, da Faltscharidas naschius ils 3 fenadur 2015, feagl dad Alexander Reith ed Anna Mayer. Cordiala gratulaziun als loschs geniturs.

Cunquei arvel la 23avla seduta dalla perioda d'uffeci 2013/2016."

Tractandas:

1. Saramentaziun d'in niev commember dil cussegl da vischnaunca
2. Protocol nr. 22 - 2013/2016
3. Allontanament e purificaziun dallas auas: Orientaziun
4. Sanaziun dalla baselgia claustrala sogn Martin: Damonda per ina contribuziun (messadi nr. 29-2013/2016)
5. Casa da scola nova: Damonda per in credit da projectaziun da sanaziun (messadi nr. 30-2013/2016)
6. Situaziun futura sil sectur turistic enteifer nosssa vischnaunca: Interpellaziun (interpellaziun nr. 3-2013/2016)
7. Ura da damondas (conform ad art. 44 dil regulativ da fatschentas)

Cussegl da vischnaunca Disentis/Mustér
Il president: Igl actuar:

Edgar Durschei

Ervin Maissen



Cussegl da vischnaunca 23-2013/2016
Seduta dils 21 d'uoost 2015

1. Saramentaziun d'in niev commember dil cussegl da vischnaunca

President dil cussegl da vischnaunca

Muort la demissiuin da cusseglier Marco Schmed eis ei stau necessari d'eleger in niev commember pil cussegl da vischnaunca. Ils 14 da zercladur 2015 han votantas e votants da Mustér eligiu Adrian Deflorin da Cuoz sco niev commember dil cussegl da vischnaunca pil temps restont dalla perioda d'uffeci 2013/2016.

Cusseglier Adrian Deflorin empermetta d'ademplier tut las obligaziuns da siu uffeci tenor meglier saver e puder.

Cussegl da vischnaunca Disentis/Mustér
Il president: Igl actuar:

Edgar Durschei

Ervin Maissen



Cussegl da vischnaunca 23-2013/2016
Seduta dils 21 d'uoost 2015

2. Protocol nr. 22 - 2013/2016

President dil cussegl da vischnaunca

Il protocol ei vegnius tarmess tier per posiziun. Enteifer ils 5 dis fixai ei vegniu inoltrau neginas objecziuns da muntada.

Il protocol nr. 22-2013/2016 dalla seduta dils 12 da zercladur 2015 vegn approbaus senza midadas.

Precisaziun tier tractanda 5, pagina 13

En quei cass setracta ei dalla parcella 705. Il studi elaboraus communablamein entras la vischnaunca ed igl uffeci da construcziun bassa dil Grischun cumpeglia il tschancun dalla Via Lucmagn denter la parcella **705** (buca la parcella 805) e la Punt Langini.

Cussegl da vischnaunca Disentis/Mustér
Il president: Igl actuar:

Edgar Durschei

Ervin Maissen



3. Allontanament e purificaziun dallas auas: Orientaziun

Suprastonza communal

Il cussegl ha saviu prender investa duront ca. in'ura dils stabiliments dalla serenera a Raveras. Gerau Roger Tuor cumpletescha aunc entgins detagls. Tenor sia opiniun ei il temps per ina detagliada investa dil menaschi dalla serenera staus memia cuorts. El menziunescha ch'il concept da sanaziun che sebase sin in studi dil biro d'inschignier Caprez preveda pils proxims 10 onns investziuns da ca. 4 milliuns francs. Per saver far quellas investziuns eis ei necessari da recaltgar ils mieds finansials necessaris.

Il president communal Francestg Cajacob informescha davart la situaziun finansiala. Ina cumissiun preparatoria ei sefatschentada davart quellas damondas. Ins vegn tier la conclusiun da preveder in augment dallas taxas annualas el rom dalla lescha vertenta. La situaziun dad oz ei buca legrevla, essend che las taxas da colligiaziun vegnan duvradas per cuvierer ils cuosts da menaschi, ferton che quellas taxas stuessen star a disposiziun per amortisar las investziuns e crear reservas per investziuns novas. Il fatg che la vischnaunca ha stuiu reducir igl onn 2001 las taxas da colligiaziun sin camond dalla Dertgira federala dad 1.20% sin 0.85% ha giu per consequenza, ch'ei maunca taxas da colligiaziun el decuors dils davos 14 onns 30% entradas. Las calculaziuns stadas fatgas ils 1990 eran buca exageradas a vesta dalla ruosna che sedat oz davart la finanziaziun speciala allontanament e purificaziun. Ulteriuramein ha ei duront 10 onns dau negin augment dallas taxas annualas. Gia igl onn 2005 eran las taxas annualas vegnidas calculadas memia stretg.

Cun in augment dalla taxa da consum da 50 rp. sin 60 rp. ed in augment dalla taxa fundamentala per 80% duess ei esser pusseivel da mantener igl equiliber finansial entochen igl onn 2041. Tenor las directivas cantunalas astga la cumpart dallas taxas fundamentalas muntar entochen a 75%. Tier vischnauncas turisticas astga quella cumpart era survargar igl importo da 75%. En cumparegliaziun cun las vischnauncas dil cantun Grischun semovan las taxas pigl allontanament e la purificaziun dallas auas sut la media.

Igl augment dallas taxas duei passar en vigur l'entschatta digl onn 2016. La fatschenta vegn suttamessa el decuors dils meins october/november al cussegl da vischnaunca.

President dil cussegl da vischnaunca

Cunquei ch'ei setracta tier quella fatschenta d'ina informaziun ha buca liug ina discussiun. La discussiun vegn menada cun caschun dalla tractaziun dalla fatschenta.

Cussegl da vischnaunca Disentis/Mustér
Il president: Igl actuar:

Edgar Durschei

Ervin Maissen



4. Sanaziun dalla baselgia claustrala sogn Martin: Damonda per ina contribuziun (messadi nr. 29-2013/2016)

Suprastonza communal

President communal Francesc Cajacob presenta la fatschenta en num dalla suprastonza communal a basa dil messadi nr. 29-2013/2016. Cunquei che la contribuziun sa vegnir repartida sur 10 onns, duess quei importo buca impedir las ulteriuras investiziuns che spetgan da vegnir realisadas.

Discussiun davart la detta d'entrada

Il cussegl da vischnaunca desista da menar ina discussiun generala davart la fatschenta, aschia ch'igl ei decidiu da tractar la fatschenta en detagl.

Discussiun en detagl

Cussegl da vischnaunca

Setracta ei tiel fatg che las vischnauncas vischinontas duein era separticipar cun ina contribuziun vid ils cuosts d'ina cundiziun per la contribuziun dalla vischnaunca da Mustér ni plitost d'in giavisch? Tenor il plan d'activitad 2014 quintavan ins cun ina contribuziun dad 1.5 entochen 2.0 milliuns francs. Ha la suprastonza communal reduciu la summa ni sedrezza la proposta tenor la damonda dalla Claustra? Sa ei esser che la vischnaunca sto quintar cun ulteriuras damondas da sustegn?

Suprastonza communal

La damonda per ina contribuziun dad 1 milliun francs deriva dalla Claustra. La Claustra ha ina gronda impurtonza per nossa regiun. Corrispudentamein vegn giavischau che las vischnauncas vischinontas separticipeschan medemamein cun ina contribuziun commensurada vid la sanaziun dalla baselgia. En connex cun la sanaziun dalla baselgia claustrala setracta ei dalla suletta contribuziun che la vischnaunca vegn a conceder.

Cussegl da vischnaunca

Animescha la Claustra da risguardar en connex cun las cumpras da products e victualias pli ferm las fatschentas indigenas che quei para dad esser ussa magari il cass.

Decsiun

Cun 14 encunter 0 vuschs e 0 abstenziuns decida il cussegl da vischnaunca da:

- *Conceder in credit dad 1 milliun francs per la restauraziun dalla baselgia claustrala sogn Martin;*
- Suttametter quei conclus tenor art. 32, lit. d dalla constituziun communal alla votaziun dil pievel.

Cussegl da vischnaunca Disentis/Mustér
Il president: Igl actuar:

Edgar Durschei

Ervin Maissen



5. Casa da scola nova: Damonda per in credit da projectaziun da sanaziun (messadi nr. 30-2013/2016)

Suprastonza communal

En num dalla suprastonza communal ed a basa dil messadi nr. 30-2013/2016 presenta gerau Iso Mazzetta la fatschenta. Schegie che quell'investiziun ei vegnida spustada tenor il program d'investiziun, muossa la situaziun ch'igl ei necessari da cuntinuar cun la fatschenta. Perquei ha la suprastonza communal decidiu da cuntinuar cul project.

Las indicaziuns el messadi sebasan sin las retschercas dalla gruppa da lavur, ensemen cun ils planisaders. La situaziun dallas naschientschas muossa in svilup stabil da ca. 16 scolars per onn entochen silmeins igl onn 2010. La tabella davart las localitads necessarias muossa ina survesta davart ils basegns da localitads e la grondezia da quellas. Las indicaziuns ein denton buca ligiontas. Il volumen dalla scola nova cun gronds spazis vits lubescha denton d'endrizzar localitads supplementaras. In'engrondaziun dil volumen dalla scola (baghetgs) ei pusseivla, aschinavon ch'il svilup el futur pretenda quei. Tenor il project previu ei in'engrondaziun dil volumen buca previus. Denton vegn ei ad esser necessari da sanar materias nuscheivlas. Actualmein ein ils materials nuscheivels ligiai e muntan negin prighel. Il prighel sefa denton il mument dalla sanaziun cura ch'ils materials pertuccai ston vegnir spazzai ni che quels vegnan donnegiai. Quei mument ei ina sanaziun da quels materials necessaria.

Tenicamein exista in problem static. La casa da scola ei en quels onns vegnida construida senza risguard sin prighels da tiaratriembel. En connex cun la sanaziun dil baghetg vegn il rinforzament per baghetgs publics pretendius. In problem ei la ventilaziun dils locals da scola. La cumpart dalla humiditad ei en scola nova generalmein memia bassa, quei che contribuescha ad in schliet clima enteifer las stanzas da scola. Supplementarmein duein el senn dall'intervenziun da cusseglier Christoph Berger era ils contuorns dalla casa da scola vegnir integrai el project.

La suprastonza communal ha gia giu instradau la submissiun davart las lavurs da projectaziun tenor procedura d'invitaziun. Deplorablamein ha in dils envidai inoltrau in recuors alla Dertgira administrativa. Sin fundament dalla summa da project ha la suprastonza communal stuiu revocar la procedura. La procedura vegn a vegnir instradada danovamein tenor la procedura aviarta resp. selectiva (art. 14 dalla lescha da submissiun). La damonda da credit sebase sin las enconuschientschas d'ina offerta directiva.

Discussiun davart la debatta d'entrada

Cussegl da vischnaunca

Ei la procedura prevedida buca empau cumplicada? Cun la summa prevedida impundan ins in grond import per studis e projects che savessen setschentar en truchet. Co sepresenta la situaziun tier ils ulteriurs projects sco il project cumplessiv pil Center da sport e cultura, l'Ovra electrica Val

Acletta? Tgei prestaziuns ein cuntenidas tenor la norma SIA 102? Preveda quella in svilup dil project en pliras fasas?

La sanaziun ei necessaria. Lein nus mantener in center eis ei indicau da procurar per las investiziuns necessarias. Tuttina ha la dimensiun dalla damonda da credit fatg pigliar tema. Ei setracta d'ina gronda summa, aschinavon che la damonda da credit per la realisaziun dil project stuess vegnir suttamessa alla votaziun dil pievel.

Suprastonza communal

Aschinavon ch'ins cuntinuescha buca cul project, tschentass ins in studi empau custeivel en truchet. Cun conceder il credit da projectaziun vegn buca duvrau la summa cumpleina da frs. 450'000.-- per preparar il project. Quella summa ei necessaria per tuttas lavurs da planisaziun e survigilanza. Aschinavon ch'ei vegn buca cuntinuau cul project suenter l'elaboraziun da quel, vegn la summa restonta buca duvrada.

Cussegl da vischnaunca

Sch'ei vegn ad esser necessari da suttametter la damonda da credit al pievel, sto il messadi esser formulaus aschia, che quel vegn era capius. Ina damonda da credit mo per la fasa da project havess caschunau pli pauca discussiun. Per ch'ei seigi capeivel da tgei ch'ei setracta tier quella fatschenta, eis ei necessari da cumpletar la formulaziun dalla proposta dalla suprastonza communal. Ein ils cuosts pil studi era cunteni en la summa da frs. 450'000.--?

Suprastonza communal

Il studi ei serraus giu. Consequentamein ein ils cuosts pil studi buca cunteni ella damonda da credit. Sparter il credit e las incaricas ei prigulus. Las prescripiuns dalla lescha da submissiun savessen tenor situaziun haver per consequenza, ch'ina cuntinuaziun dallas lavurs entras il planisader che ha planisau il project fuss buca pusseivla. La suprastonza communal sa denton s'accordar da cumpletar il text per la damonda da credit per che la formulaziun seigi pli capeivla. Il messadi comunichescha da principi claramein tgei ch'ei cunteniu en quella summa.

Discussiun en detagl

Il cussegl da vischnaunca desista da far ina cunterproposta, aschia ch'igl ei decidiu d'entrar e tractar la fatschenta.

Cussegl da vischnaunca

Sch'ins calculescha las lavurs previdas tenor la norma SIA 102 pil studi a basa dil credit ch'ei dumandaus, survarga quella summa ils frs. 100'000.--.

Suprastonza communal

Pil studi ha la vischnaunca impundiu ina summa da ca. frs. 90'000.--. Da menziunar ei denton ch'il studi cuntegn neginas lavurs en connex cun ils contuorns. Perquei sa la summa da frs. 450'000.-- buca vegnir quintada entuorn en relaziun dils cuosts impundi pil studi.

Cussegl da vischnaunca

La seduta vegn interrutta per surluvrar il text per la proposta.

Proposta

La proposta surluvrada secloma sco suonda:

Conceder in credit da planisaziun (projectaziun ed execuziun/Bau- u. Ausführungsprojekt) da frs. 450'000.-- per la sanaziun dalla casa da scola "nova" Cons e la piazza da scola.

Decisiun

Cun 14 encunter 0 vuschs e 0 abstenziuns conceda il cussegl da vischnaunca in credit da planisaziun (projectaziun ed execuziun/Bau- u. Ausführungsprojekt) da frs. 450'000.-- per la sanaziun dalla casa da scola "nova" Cons e la piazza da scola.

Cussegl da vischnaunca Disentis/Mustér
Il president: Igl actuar:

Edgar Durschei

Ervin Maissen



6. Situaziun futura sil sector turistic enteifer nossa vischnaunca: Interpellaziun (interpellaziun nr. 3-2013/2016)

Cussegliaer Flavio Murer, interpellant

Cumpletscha oralmein las damondas indicadas en sia interpellaziun.

Suprastonza communal

Il president communal rispunda l'interpellaziun sco suonda:

“La damonda davart il futur turistic da nossa destinaziun fatschenta la suprastonza communal intensivamein. La visada sorprendenta dalla collaboraziun cun Sedrun Mustér Turissem (SMT) entras la vischnaunca da Tujetsch ha leventau differentas reacziuns a Mustér cunzun negativas. Actualmein ha la suprastonza communal elaborau ina cunvegna da prestaziun denter vischnaunca e SMT ed aschia documentau ch'ins vegli collaborar comunabla.

Cussegliaer guvernativ Jon Domenic Parolini constatescha ch'il cantun seigi s'engaschias il davos onns intensivamein, aschibein finanziamein sco era cun resursas persunalas, per rinforzar il svilup economic e turistic sisum la Surselva. Aschia ei il cantun trumpaus che las discussiuns en connex cun il turissem periclitessan quellas finamiras. La regenza pretenda en connex cul program „Progetto San Gottardo 2020“ (PSG) ina collaboraziun turistica denter Mustér e Sedrun. En quei connex prevedan ils cantuns Grischun ed Uri ina meisa rodonda nua ch'ei vegn reglau il svilup e la collaboraziun turistica. Cheu stattan cunzun la finanziaziun dallas colligiaziuns dallas pendicularas Andermatt-Sedrun e Mustér-Sedrun el focus.

Corrispundentamein ei era la suprastonza communal s'exprimida en ina comunicaziun da pressa: „Ei vala d'agir immediatamein per garantir las considerablas contribuziuns che scadan, aschinavon ch'ei reussescha buc allas vischnauncas da Tujetsch e Mustér entochen la fin da 2015 da collaborar era futuramein sco partenaris en in'organisaziun turistica. Senza quei agid finanziel ei in svilup sisum la Cadi e sur ils cunfins dil cantun Grischun ora periclitau. La vischnaunca da Mustér promova e sustegn stretgas collaboraziuns cunzun a basa da products comunabels (p.ex. viandar, cultura e Rein) cun las destinaziuns turisticas d'Ursera e Surselva“.

La suprastonza communal ha en collaboraziun cun il cussegliaer Marcel Friberg elaborau ina strategia per nies futur Cheu han ins saviu sebasar sin il memorandum sco era silla studia OPTIMA KONKRET. El focus stattan primarmein ils basegns dils hospes e dallas fieras. Vinavon ha la suprastonza communal da Mustér proponiu ina destinaziun cun partenaris equals „Andermatt-Sedrun-Mustér“. Ella seduta dils 18 d'uoost 2015 cun representants dad Andermatt Urserntal Tourismus (AUT), Andermatt Swiss Alps AG (ASA) ed Andermatt Sedrun Sport AG (ASS), Tujetsch e Mustér ei vegniu fixau il suadont agir:

1. Tuts treis loghens sustegnan da crear ina DMO communal cun partenaris equals.

2. Concernent ils mieds finansials e la marca duei exister ina flexibilitad commensurada, aschia che mintga partenari ha la pusseivladad da realisar atgnas activitads (p.ex. il Rein, la Claustra).
3. Ina part essenziala ei ina colligiaziun da tariffas (Andermatt Sedrun Arena e Pendicularas Mustér). ASS e las PM elaboreschan ina proposta.
4. Il meins november 2015 decidan ils partenaris definitivamein davart dalla fundaziun d'ina DMO. Il datum operativ vegn fixaus pli tard. A vesta dalla situaziun nova ei la vischnaunca da Tujetsch prompta da porscher maun per ina sligiaziun transitoria.

Il proxim workshop ha liug miez settember 2015 per sclarir tuttas damondas per ch'ina decisiun seigi il meins november 2015 pusseivla.

Per ch'ina sligiaziun cun ina DMO comunabla seigi pusseivla, vegnan las suprastonzas a preparar la fatschenta. Concernent il menaschi vegnan ils partenaris da prestaziun involvai.

La meisa rodonda d'elefant organisada dil cantun ha liug enteifer il meins october/november 2015."

Cussegliaer Flavio Murer

Engrazia per las informaziuns detagliadas. El ei dil meini ch'ei seigi d'involver ad uras l'entira interessenza turistica ed informar la populaziun. A vesta dall'impurtonza dalla fatschenta giavischa el ch'il cussegl discussiuneschi la fatschenta.

Cussegl da vischnaunca

In bien pass en la dretga direcziun ei la colligiaziun da tariffas denter las pendicularas dalla quala ins ha saviu leger dacuort. Ei fuss plascheivel, sche quella savess vegnir realisada proximamein. Denton basegna ei ulteriurs sforzs per far pli attractiva nossa destinaziun. Han ins era giu contact cun la destinaziun Surselva Turissem? Tgei di Marcus Weber, investur dallas pendicularas, dalla situaziun actuala?

D'ina vart ei Marcel Friberg president da Grischun Vacanze e da l'autra vart cusseglia el nossa destinaziun/vischnaunca davart las damondas turisticas actualas. Quei porscha d'ina vart pusseivladads da sinergia, sa denton era caschunar conflicts d'interess. Impurtont ei che tuts pertuccai tilien ella medema direcziun. Tenor situaziun savessen singuls products era vegnir vendi ensemen cun Tujetsch a basa da cunvegnientschas da prestaziun.

Suprastonza communal

La tematica ei brisanta. Il cantun pretenda ina colligiaziun da tariffas e fa dependenta quella da sias contribuziuns. Ei exista ina proposta davart dallas pendicularas. Schebein quella colligiaziun sa vegnir realisada gia sigl unviern proxim ei denton incert. Cheu settracta ei da contractivas denter duas interpresas privatas.

Ins ha giu contact cun Surselva Turissem. Denton ei semussau che la colligiaziun cun Sedrun ei pli stretga e ch'ins dispona da pli biars products comunabels. Vender singuls products sin fundament da cunvegnientschas da prestaziun ensemen cun Surselva Turissem ei la finamira.

Il contract cun Grischun Vacanze ei pil mument sistius. Ins less denton reactivar quel las proximas jamnas, era per saver cuntinuar cun la vendita e reclama entochen che la nova destinaziun ei en funcziun.

Pil proxim unviern ein ils products mess sin via. Denton eis ei impurtont da far las preparativas per la stad vegnenta. Il mument giavischa Ursera ina DEMO communabla. Quella situaziun promova ina cuntinuaziun dalla discussiun.

Schegie che Samignun fuorma cun Ischgl ina destinaziun sur ils cunfins, ei Grischun Vacanzas in ferm partenari da quella destinaziun. En quei senn duess ei era el cass d'ina collaboraziun sur ils cunfins dil cantun esser pusseivel da mantener la collaboraziun cun Grischun Vacanzas. Impurtont ei che tuts partenaris vegnan pri serius e san sediscuorer sil medem nivel. La pusseivladad d'ina collaboraziun eguala porscha dapli pusseivladads.

Cussegl da vischnaunca

La collaboraziun cun Tujetsch sa buca esser tuttina, tonpli ch'era nossa vischnaunca ei dependenta dils mieds finansials ch'il stadi metta a disposiziun per financiar las investiziuns ell' infrastruttura dallas pendicularas.

Suprastonza communal

Il cantun vesa il project da colligaziun dallas pendicularas sco project innovativ. Perquei exista el cass d'ina collaboraziun la pusseivladad da recaltgar susteniments. En connex cul Center da sport e cultura, che vegn giudicaus davart dil cantun sco object da muntada regiunala, exista ulteriuramein pusseivladads da recaltgar contribuziuns cantunalas. Il cantun ha denton giavischau examinaziuns supplementaras en connex cun la porschida dil CSC. Quei ei il motiv, daco ch'il project cumplessiv pil qual il cussegl da vischnaunca ha giu concediu in credit el rom dil preventiv 2015, s'entarda.

Cussegl da vischnaunca Disentis/Mustér
Il president: Igl actuar:

Edgar Durschei

Ervin Maissen



7. Ura da damondas (conform ad art. 44 dil regulativ da fatschentas)

Suprastonza communalala

Muort absenza da cusseglier Livio Zanetti, vegn sia damonda ch'ei vegnida inoltrada a scret rispundida pér a caschun dalla proxima seduta.

Cussegl da vischnaunca

Ils gronds donns da lenna ch'ein vegni caschunai l'entschatta november 2014 ed igl unviern 2015 ein luvrai si. Co sepresenta la situaziun da cuosts a vesta dils gronds quantums lenna ch'ein vegni sgulai la primavera ord igl uaul? Tgei summa astga la vischnaunca spitgar davart dil cantun? La suprastonza communalala duess informar il cussegl da vischnaunca a caschun d'ina proxima seduta davart quella situaziun.

Ins giavischa ch'ei vegni scret ina brev als possessurs da habitaziuns secundaras ed informeschi els davart la situaziun dallas entradas ord la taxa turistica e tgei che capeta cun il recav ord quellax. Plinavon fuss ei interessant da saver co la situaziun sepresenta en connex cugl incasso dallas taxax che ha caschunau enqual discussiun.

Suprastonza communalala

Igl ei stau necessari d'elavurar ca. 15'000 m³ lenna. Il recav ord la vendita da lenna ei buca gronds, cunquei ch'il prezi sin fiera ei daus ensemen. Plinavon ei la situaziun semidada negativamein muort il cuors digl euro, cunzun per la lenna che sto vegnir exportada.

Igl incasso dalla taxa turistica ha caschunau empau discumets. Encunter la fixaziun dalla taxa ei vegniu inoltrau en ca 10% dils cass ina protesta, quei che munta ca. 100 entochen 120 proprietaris da habitaziuns. Quels cass ston aunc vegnir rispundi. La suprastonza communalala vegn a ponderar co ins sa informar ils proprietaris dallas habitaziuns davart il diever dil recav. Las purschidas supplementaras ch'ins ha saviu metter a disposiziun ein vegnidax apprezzadas. Ord vesta dalla suprastonza communalala exista denton negina necessitad da seperstgisar.

Herbert Schmelzer vegn ad entscheiver igl 1. da settember sia incarica sco meinafatschenta dil CSC. Duront igl εμπrem temps vegn el introducuis en sia lavur entras Umberto Zanin. Sco εμπrem pedel ei Albert Sgier oriunds da Campliun vegnius eligius. El entscheiva sia incarica igl 1. da november 2015. Albert Sgier ei staus in tschuat onns collaboratur dil Center da sport a Prau la Selva, Flem.

Ils 2 da settember 2015 tracta il cussegl da vischnaunca la revisiun parziala dalla planisaziun locala. La documentaziun vegn a vegnir tarmessa tier cun in pèr dis retard.

Ils 11 da settember 2015 ha liug allas 20¹⁵ in'orientaziun davart la meglieraziun funsila. Il medem di entscheiva la publicaziun ufficala dil project dalla meglieraziun.

President dil cussegl da vischnaunca

La proxima seduta dil cussegl da vischnaunca ha liug mesjamna, ils 2 da settember 2015 allas 20¹⁵ en casa communal. Cun quei ch'il president ei cumpigliaus persunalmein en quella fatschenta, vegn el a prender stgisa a caschun da quella seduta che vegn empallada dil vicepresident.

El astga envidar ils presents alla tscheina che suonda ella Stiva Sogn Placi.

Pendenzas

Fatschenta/Sparta	Termin	Responsabel	Remarcas
Recav dil gudogn dalla cuminonza da maschinas forestalas Cadi	Ils 27 da fevrer 2015	Gerau Roger Tuor	
Finanziaziun bus local cto. 651.315.00 Cumpart interessenza turistica	Preventiv 2016 November 2015	President communal	Previu enteifer preventiv 2016
Informaziun dalla populaziun davart la politica da tgira	Ils 24 d'avrel 2015	Geraua Cecilia Maissen	

Cussegl da vischnaunca Disentis/Mustér
Il president: Igl actuar:

Edgar Durschei

Ervin Maissen